



*Selasa, 31 Juli 2023*  
**Ogen: Perbahanen Rasul 18:24-26**



**Njagai Pengajaren**



**T**ak ada gading yang tak retak, ngatakenca la lit pemete si sempurna. Amin uga gia buena buku si ioge, sumber ilmu iwawancarai ras penelitian ilakoken, tetap saja la lit pemete si serta 100 persen mutlak. I bas kesempurnaan lit nge si jumpai kekurangan tah pe kelepak. Kekurangan kitik pe banci jadi celah si berbahaya ras ncedai. Emaka payo ka nina i bas kitab Kuan-kuanen 3:9 *ola akapndu pentar kam lebih asa patutna.*

Reh beluhna sekalak jelma, arus isedarina buen kapen si la si angka gelah terus ateta erlajar. Sabap ise iakapna bana nggo beluh, banci ia isidingi kinibeluhenna jine. Ibabo langit lit denga langit si terganjangan. Secara pribadi lepas pribadi kita arus lalap mengevaluasi ras memotivasi dirinta terus ndarami pemete, guna njagai pengajarenta teraloken kalak ras mabai kalak nandai Dibata alu payo.

Apolos sekalak si beluh, ia ngkuasai Padan Si Ndekah alu mbages. Kenca jadi kalak Kristen nggit ia ngajari kerna kebenaran ras pertobatan bagi siniajarken Johannes. La ia mbiar erdebat kerna si e ras kalak Jahudi sabap alu jelas ietehna kai si itekina. Tapi lit sitik catatan, si iangkana e eme erpalasken pengajaren Johannes denga. Ngidah si e reh Persila ras Akuila maba ia ku bas perpulungen i ja radu ras kalak enda mpetangkas man Apolos kerna kebenaran si rehna bas Tuhan Yesus, si enda guna ngkuhi kai si enggo iangka Apolos kerna jadi kalak Kristen si tahu-tuhu.

Si idah i jenda maka Persila ras Akuila ras perpulungen enggo makeken fungsi kiniersadanna guna njagai pengajaren gelah tetap focus man Tuhan Yesus. Tuhan Yesus tetap arus jadi pokok pengajaren kinitekenta. Melala aplikasi-aplikasi sibanci sigali arah pemete doni, tapi pengajaren Pustaka ras kai kata Tuhan Yesus eme siutama siman ikutenta bas kegeluhen enda. Yesus kap dalam, kebenaran ras kegeluhen ise pe la banci nandai Bapa adi la arah IA. Eme pengajaren si tahu-tuhu, gelemlah e.

